

Uunga siunnersuut: Meeqqat illersuisuat aamma Meeqqat pillugit Siunnersuisoqatigiit pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2019-imeersoq

(Meeqqat illersuisuata aamma Meeqqat pillugit Siunnersuisoqatigiit ilaasortaasa piffissamik toqqagaaffiannik allanngineq)

(Peqqissutsimut, Isumaginninnermut Inatsisinillu atuutsitsinnermut Naalakkersuisoq)

Saqqummiussissut

(Peqqissutsimut, Isumaginninnermut Inatsisinillu atuutsitsinnermut Naalakkersuisoq)

Siullermeerneqarnera

Meeqqat illersuisuat aamma Meeqqat pillugit Siunnersuisoqatigiit pillugit Inatsisartut inatsisaata allanngortinneqarnissaanik Inatsisartut inatsisissaannik saqqummiussisinnaanertik Naalakkersuisut nuannaarutigaa.

Meeqqat illersuisuat aamma Meeqqat pillugit Siunnersuisoqatigiit pillugit Inatsisartut inatsisaat ulloq 1. marts 2012-imi atuutilerpoq. Meeqqanut illersuisoqarnermit, Meeqqat pisinnaatitaaffii pillugit suliffeqarfeqarnermit (MIO) aamma Meeqqat pillugit Siunnersuisoqatigeeqarnermit misilittakkat takutippaat Meeqqat illersuisussaannik toqqaanissamut malittarisassat Meeqqat illersuisuata suliassanik isumaginnittarneranut naammaginantumik iluaqutaanngitsut.

MIO Meeqqat illersuisuannit aqunneqarpoq ullumikkullu suliffeqarfittut suliassanik pingaartitsisutut atuulluni, tassani ilisimasanik katersinissamut kiisalu suliniutinik ineriartortitsinissamut aallartitsinissamullu tunngatillugit piffissaq ungasinnerusoq eqqarsaatigalugu pilersaarusiortarnissaq pisariaqartinneqarpoq.

MIO suliassanik inatsisitigut pisussaaffiusunik aamma anguniakkat iliuusissallu pilersaarusiortarnerannik isumaginnittarpoq, isumagisartagai Meeqqat illersuisuata ullumikkut ukiuni pingasuni attuuffigisartagaani amerlavallaarput.

Tamatuma saniatigut pingaaruteqarpoq oqaatigissallugu innuttaasut Meeqqat illersuisuannut MIO-mullu tatiginnikkiartornerat ilisimasaqariartornerallu piffissamik atuuffiusussaammat. Innuttaasut pingaartumillu meeqqat MIO-mik inummut ataatsimut sammititsisarnerisa suliffeqarfimmik taassumalu arlaannaannulluunniit attuumassuteqanngitsutut inissisimaneranik ataqqinninneq annertusaqataaffigissavaat. Aamma meeqqat pisinnaatitaaffitik naqisimaneqartut ulorianartorsiortinneqartulluunniit misigisimagunik ajornannginnerusumik takusinnaassavaat kina sinnisorinerlugu sumullu saaffiginnissinnaanerlutik.

Meeqqat illersuisuannik arlaleriarluni toqqaqqissinnaanermik killiliinerup aamma malitsigisinnaavaa Meeqqat illersuisuata ingerlalluartup allamik suliassamik isumaginninnissamut piginnaasakinnerusumik taarserneqartariaqarnera, tassa toqqaqqinnissamut periarfissaqarani piffissap toqqaaffiusussap qaangiunnera pissutigalugu.

Taamaattumik Inatsisartut inatsisissaannik siunnersuummik saqqummiussinikkut Meeqqat illersuisuata piffissaq atuuffia ukiuni pingasuniit sisamanut sivitsorneqarnissaa kiisalu Meeqqat

illersuisuannik qasseriarluni toqqaqqissinnaanerani killiliisimanerup
atorunnaarsinneqarnissaa anguniarneqarput.

Misilittakkatigut aamma takuneqarsinnaavoq Meeqqat pillugit Siunnersuisoqatigiinni
ilaasortanik tamanik ataatsikkut taarsiisarneq siunertamut naapertuuttanngitsoq.

Taamaattumik siunnersuuteqarnikkut aamma anguniarneqarpoq Meeqqat pillugit
Siunnersuisoqatigiinni ilaasortat atuuffiisa ukiuni pingasuniit sisamanut sivitsorneqarnissaat
kiisalu Meeqqat pillugit Siunnersuisoqatigiinni ilaasortanik ingerlaavartumik taarsiisarnissaq,
tassa ilaasortat affaat ukiut marlukkuutaarlugit taarserneqartartussanngorlugit.

Taamatut oqaaseqarlunga siunnersuut matumuuna Inatsisartunut akuersaartumik
suliarineqartussanngorlugu tunniuppara.